

**Wir Matheus** von gots genaden/der heiligen Römis-  
chen Kirchen Cardinal/Erzbischoue  
zü Salzburg/Legat des Stuels zu Rome rc. Embieten  
allen vn̄ yeden/vnsern Haubtleuten/Vitzthümben/Pflegern/  
Bröbsten/Ambtleuten/vnd iren verwesern/Land vn̄ Perck-  
richtern/Statrichtern/Burgermaystern/Räten/Gemainde  
vnd sonst allen anndern vnsern vnd vnsers Stifts vnder-  
thanen vnd getrewen/vnsern grües vnd gnad züvor. Als  
wir vns auf dem Landtag in der vassten/negstuerschine/mi-  
den Stenden/vnserer vnd vnsers Stifts Landschaft/ver-  
gleicht vn̄ genedigklich bewilligt haben/ain lobliche gleichmäſ-  
sige/güte Landsordnung/vnd Pollicey/in vnnserm Fürsten-  
thümb vnd Land aufzürichten/daran wir aber/aus dem züe-  
fall/des Neuen auf standts/bishere/verhindert worden sein.  
Deshalben/auf disem yetgehalltem Landtag Martini/von  
aufrichtung solher Landsordnung/verrer gehandelt worden  
vnd fürgenomen ist/dieselb nochmaln zum förderlichisten auf  
zürichten. Daneben so ist auch in den vnerledigten vnserer vn-  
derthanen beschwärungen/in beysein vnnnd mit Rate der lob-  
lichen Stennde des Bunds zü Schwaben verordneten Rä-  
ten/souil gehandelt/das der merer tayl derselben beswärun-  
gen/auf zymlich wege vergleichet/ auch durch vns als Herrn  
vnd Landfürsten also züeglassen vn̄ bewilligt sein die auch  
verrer in aufrichtung der neuen Landsordnung/in diesellb ver-  
lebt vnd eingezogen werden sollen.Damit aber vnser vn̄ vn-  
ser Stifts vnderthanen/mitler zeyt/bis solh Lanndsord-  
nung aufgericht wirdet/über vnnnd wider solh yetzbeschehen  
vergleichung/gedächter irer fürgebrachten beschwär Artigk-  
weyter mit beschwär/sonder denselben gemäß nw fürohin  
gehallten werden.So hat vns vnd die Stennde vnserer land-  
schafft für not vnd güt angesehen/solh vergleichung vn̄ für-  
nemen/allennthalben in vnnserm Stift vn̄ Lande/offenlich  
züerkünden.Daneben auch anders/what zu vnderhalltig  
güt gehorsam/frid vnd rüe/in vnnserm Stift diser zeyt not  
sein wil/fürzunemen vnd züverordnen/damit sich meniglich  
darnach zürichten wisse/wie dann von Artigkeln zü artigkeln  
hernachfolgt.

### Geystlickait.

Ansennglich. Als in den beschwärungen vnserer Vndertha-  
nen/etwouil Artigk fürkömen sein/die vnsern heiligen glau-  
ben/vnd das geystlich wesen betreffen.Darauf ist beschlossen



und fürgenomen/das es nuw fürohin/nach aufweysung/des  
Bäbstlichen Legaten Reformation/Auch des Regenspurg-  
ischen Abschids/vnserer Mandaten/vor vnd nach dem Re-  
genspurgischem Recess aufgannen.Auch nach vermüg/des  
Recess/des jüngsten Synodus/hye zu Salzburg/jm fünff  
vnd zwainzigistn jar/gehalten werden sol/bis durch das hei-  
lig Römisck Reich vnd ain gemain Cristlich Concilium/dar-  
innen verrer ordnung gegeben wirdet.Vnd sollen darauf/die  
selben aufganganen Mandat vnd Ordnungen/durch vnser  
Psleger/Richter vnd Ambtleüt/vnd annder vnser nachge-  
setzt Oberkaiten/allenthalben in vnserm Lande/nochmalen  
vnsern Vnnderthanen verneüt/vnd verkündt werden/damit  
sich ain yeder/fürbas darnach zürichten wisse.

Vnd damit künftiglich/der gozdiest/dannoch an aym yes-  
ten ort gebürlich gehallten.Auch vnser Vnnderthanen deßt  
paß mit guten Pfarrern/Vicarien/vnd Brießtern/zü jrer not-  
tußt versehen werden/vnd dieselben je zymlich vnnderhal-  
tung haben mügen.So haben wir vns mit den Ständen  
vnserer Landtschafft auch entschlossen/in alle Gericht ettlich  
Comissari züberordnen/zwischen den Pfarrern/Vicarien/vn  
Brießtern/vnd den Pfarleuten/an allen orten der Pfärliche  
Recht vnd züstanndhalben/von ainer erbern zymlichen maß  
zuhandeln/dabey sich die Pfarrer/Vicarij/vnd annder Brie-  
ster erhalten mügen/vn dannoch den pfarleuten auch nit be-  
schwärlich sein.Vnd was dieselben Comissari also hanndeln  
werden/dabey soll es künftiglich beleyben.

## Hauptmanschafft Des Lannds vnd Malefyz

Betreffend die Hauptmanphandlungen vnd die Rechtfer-  
tigung vnd Bevestigung der Obelhäter vñ Malefizigen per-  
sonen.Haben wir hyewor in vnserer Hauptmanschafft/ain  
gleichmäßige gebürliche ordnung aufgericht.Auch vns yezo  
verrer von wegen des Costens/so über die Obelhäter wann  
die gericht werden/laufft/ainer ordnung enntschlossen/wie es  
nuw fürohin in allen vnsern vnd vnssers Stifts Gerichten/  
in vnserm Stift vnd Lannde/ auch sonnderlich/in denē Ge-  
richten/so aus vnserm vnd vnserer voruordern zuegeben/die  
hohen Gericht vnd Malefiz hänndl/selbst zürichten vnd zu  
straffen haben/vnd die in vnser Hauptmanschafft mit bringe/

gehallten werden soll.

Nemblich/wann einer hinsiran in den Gerichten/darinn vñ-  
ser Psleger vñ Richter/über die Malefizigen sachen/fürsich  
selbs nit zürichten haben/in fronfest angenommen wirdet/so  
soll durch den Psleger oder Richter an demselben ortt/gegen  
demselben gefangen/nach Rat vnd erkanntnuß/ettlicher  
erbarer lewmbdiger nachtpern des Gerichts/mit peynlicher  
frag gehandelt/vnd des gefangenen vrgicht/fürderlich vn-  
serm Haubtman zügeschickt werden/derselb vnnser haubt-  
man/soll alsdann vonstundan vnnsern Landtschreiber an das-  
selb ort schickhen/vnd wo erfunden wirdet/daz der gefan-  
gen vmb sein übelthat billich das Malefiz Recht übersteen sol  
So soll der Landtschreiber solhes fürderlich/verrer vnserm  
Haubtman züeschreiben/der sol alsdam den Panrichter vnd  
Züchtiger/zü solhem Rechten an dasselb ort verordnen vnd  
schickhen.

Es soll auch in den yetgemellten vnd den anndern gefreyten  
Gerichten/für die Atzung des gefangenen/der oberkait bezallt  
werden/ain yede wochen/drey schilling pfennig/vnd dem  
Ambtman vñ der frag vñ dem fürfueren/ain pfund pfennig.

So sol vnnserm Landtschreiber vnd Panrichter auch dem  
Züchtiger/nemblich Je yedem für zerung ye auf ain tag vnd  
nacht zwainzigk kreutzer gegeben werden.Item dem Panrich-  
ter/für sein Besoldung/allweg von ainer person ain guldin/  
vnd dem Redner/so am ersten das vrtl fellt vier schilling pfen-  
ning/vnd den anndern Rednerin/ainem yeden/sechzigk pfen-  
ning/vnd dem Züchtiger von yeglicher person/für strich vñ  
handtschüech zwey vnd dreyssig pfennig.

Vnd wo bey aym Malefizigen/der also beuestigt soult nit  
gefunden wirdet.Daz der daun gericht werden mag/so sol  
nuw fürohin halber tayl der Costung/wie obsteet/aus vnn-  
serer Hauptmanschafft/vnd der annder halb tayl/durch vnn-  
ser Gerichtz vnnderthanen/derselben ennde bezallt werden/  
aufgenomen/in den Gerichten/die das Malefiz selbst zürich-  
ten macht haben/soll solh Costung halb durch die Psleger/  
vnd der annder halb tayl/ auch durch die Gerichtz vnndertha-  
nen/aufgericht werden.Doch in welhem/der yetgemellten ge-  
freyten Gericht/die Gerichtz vnnderthanen in solhen costen  
bissher nichts bezallt haben/dasselb sollen sy fürbas zübezalen  
auch nichts schuldig sein.

## Von den Zehenden.

Die Zehend groß vnd klein/ auch der Mayzehend/sollen wie von alterher/ geraycht vnnnd gegeben werden. Was aber für vnpillich newerung darin angezaygt mügen werden/die wöllen wir auf verrer lautter vnnnd gegründt anzaygen/vnnserer vnderthanen/gnedigklich abschaffen. Es sollen auch die/so zehend haben/vnd dieselben auf jr zehenthof vnd Cässtren zu sammen bringen/vn samelnlassen/den Zehentleuten zu jrer hauf notdurstet/wo sy das begern/den trayd ainletzig metzen weise geben/wie der zu yeder zeyt sonnst zu saylem kauff geet. Dañ an den ortten/da der Mayzehendt gegeben wirdet/sollen die innhaber der zehendthof/wd die von alterheer zu gemaynem brauch der nachperschafft der enden/ain Bschellen/Stier vn Schweiern gehallten/ den Vnderthanen gethan haben/solhes gleicherweise hinsiran auch hallten vnnnd thün. Alls aber die Gericht begert haben/daz den Vnderthanen die zehende vmb ain zymlichen anschlag bey jren heüsern gelassen werden sollten. Darauf mag ain yeder sein zehendtheren/dem er den zehent zugeben schuldig ist/deshalben ersuechen/vnd sich mit jme vergleichen/wie er gnad vnd stat findet. Doch sol hierjnn der zehentherr oder grundther zu nichte gepunden sein.

Item Von den Newprüchen/sol erst nach dem dritten jare/der zehent gegeben werden.

## Leybaygenschafft vnnnd Todfall.

Der Leybaygenschafft vnnnd Todfallhalben/sol es bey dem allten Herzog Ludwigs von Bayrn ic. vertrag beleyben/der dañ vermag/daz es damit gehallten werden sol/wie von alterheer kömen ist. Doch so sol nyemandts von neuem kain leibaygenschafft vnd todfal/auf den leüten vnd güeter/dar auf die vor nit gewesen sein/aufzüpringen macht haben. Wo vnnns auch solh neuerung gründlich angezaygt werden/wöllen wir die auch gnedigklich abschaffen.

## Pawrecht vnnnd Freystifft.

Die Pawrecht vnnnd freystifft/sollen auch bey allem herkömen bleyben. Wo aber ain Vndterhan darin wider allt

herkömen beschwärt/vnd vns das lautter angezaygt wirdet/wöllen wir darinnen auch gepürlich wenndung verschaffen

## Höherung der Zyns vnd Überdiennst.

Betreffend die Höherung der Zyns vnnnd Überdiennst. Ist durch vnnns vnd die Stände vnsrer Landtschaft beschlossen vnd fürgenomen. Daz ain yeder der mit einer vnpillichen höherung aines zyns beswärt wirdet/vns als Landfürsten solh beschwärung vnnnd neuerung lautter anzaygen soll/von wem vnd wie solh höherung auf das güet kömen ist. Alsdan so wöllen wir nach verhör des Grundtheren vnnnd erfahrung der sachen vn des güets gelegenheit/die billickait verschaffen.

Wo dann ain güet von aliterhere so groß Überdiennst/vnnnd durch den holden/mit verursacht wäre/sonnder daz solhes durch ander züefäll/alls gwässer/playckhen/oder anders sich gegeben het/vnd durch den Grundtheren darinnen mit einsehung beschähe. So wöllen wir als Landfürst/auff des Beschwärten anbringen/deshalben Beschaw verordnen/vnnnd nach gehalltnet beschaw/nach zymlichen dingten/in dem diinst mässigung thün.

Item die Zyns der güeter/darauf die innhaber verschriven/oder lang hergebracht gerechtigkeiten haben/sollen durch die Grundtheren nit gestaygert werden.

Herwiderumb/so soll auch in des Grundtheren macht wosten/so ain güet/darauf der innhaber nichts dañ freye Stift oder freye vbargerechtigkeit/oder leybgeding gehabt/fellig oder ledig wirdet/dasselb fürtter/so hoch Er mag/zuerlassen/vnd den zyns seiner gelegenheit nach zu myndern vnd zu meren.

Item Wo mit der zeyt/aynicherlay überzyns auf die güeter kommen wären/also/daz die innhaber der güeter/zu zeyten aus armuet oder sonnst/ain überzyns darauf verkaufft hetten/so soll dem innhaber aines yeden güets/die losung solhes überzyns/nochmals beuor steen. Nemblich/vns das gellt wie solher überzyns verkaufft ist/oder wo die kauff summa

mit bewisst wär/ alsdann nach dem gemainen anschlag/wie  
ain pfundt geltis sonnst verkaufft wirdet.

## Der Schreybpfenning vnd Stift Trinckgellthalben.

Damit vnnser Vnnderthanen/in diesem fall vor künftiger Be-  
schwärung auch verhüet werden. So haben wir vns/mi-  
den Ständen vnnserer Landtschafft vergleycht vnd ennt-  
schlossen. Daz hinsuran/dise mass hyerjimen gehallten wer-  
den. Nemblich so soll ain yeder/~~die~~ von ain güet oder aynem  
Gründt/darauf von allterheer solh Schreibpfennig/vnd  
Stiftwein ligen/hinsuran seinem Gründtherien zugeben  
schuldig sein. Nemblich/zu Schreibgellt/zwen pfennig/vn  
für den Stiftwein/zwanzig pfennig/vnd darüber nit.

Wo aber bisheer von den Güettern vnd Gründten für den  
Stiftwein nur Sechzehn pfennig oder weniger gegeben  
worden ist/dabey soles hinsuran auch beleiben.

Was dann Söhlheiher sein/die von allterheer dergeleychenn  
Stift Trinckgelt gegeben haben/dauon soll hinsuran/für  
solh Stift Trinckgelt/Acht pfennig/gegeben werden.

## Von Den Anlaytten

Die Anlaytten sollen hinsuran ungewörlich/wie bisheer/vns  
vnd anndern Gründtherren durch vnnser vnd jr vrbaleüt/  
Holden vnd Hundersäßen/von den fälligen güettern vnd  
gründten geraycht. Doch so sollen solh Anlaytten/durch vnn-  
sern Hofmayster vnd Officier/ auch die anndern Grundtheren  
vnd jr Ambteüt/nach erbarn zimlichen dingn getädingt vnd  
genomen werden. Damit sich die Vnnderthanen vnpillicher  
neuerung vnd schatzung/darinnen mit zubeklagen haben.

Wo auch fürtter yemandts durch vnnser Officier oder ander  
Gründtherren vnd Jr Ambteüt/in den Anlaytten wider pil-  
lickait beschwärte würde. So wollen wir als Landsfürst/  
durch vns oder vnnser Statthalter vnd Räte/zu yeder zeit  
auf des Beschwärten ersuechen/darinnen gnedige einsehung/  
vnd mässigung thün.

Alls sich aber vnnser Vrbarleüt/vndter anndern der nachan-  
laytten/so vnnser Brobst vnd Ambteüt/an etlichen orten  
bisheer gehabt/beschwärzt haben. Wie wol in Betädigung vn-  
serer Anlaytten/solh vnnserer Brobst vnd Ambteüt nachan-  
laytten/durch vnnsern Hofmayster vnd Officier/allweg be-  
dacht/vnd für vnnser Anlaytt/vmb soul weniger genomen/  
Auch solhes also von allterheer ye vnd allweg gehallten wor-  
den/vnd kain neuerung ist. Nicht destymder/künftig irfüig  
vnd Beschwärung/so zu zeyten aus solher zwysacher raychung  
der Anlaytten eruolgt ist. Wollen wir künftiglich verordnen  
vnd daran sein. Daz vnnser Anlaytt/ auch vns Brobst vnd  
Ambteüt/nachanlaytt/bed miteinannder hinsuran durch vnn-  
sern Hofmayster vnd Officier/von merer richtigkeit wegen/  
in einer Anlaytt. Doch nach pillichen zymlichen dingn/vmb-  
soul desthöher getädingt/vnd genomen werden sollen. Auf  
derselben Anlaytt/soll alsdann vnnsern Brobsten vnd Ambt-  
leütten der halb oder drit tayl/darnach die Nachanlaytt/an ye  
dem ort gebreüchig gewesen ist/züecken vnd verfolgen.

Es soll auch in den fällen/vnnserer Vrbarleüt/hinsuran all-  
so gehallten werden. Nemblich/wan ain Vrbarsman mit tod  
abgeet/so sollen seine kinder/oder negst Erben/all miteinan-  
der für solhen fall schuldig sein/ain Anlaytt.

Vnd so sich dieselben vor der Ersten oder negsten Stift ay-  
ner person/die durch vbergab Jr der Erben/Vrbars gerech-  
tigkeiten an das ganz vrbar kompt/miteinander vergleichen/  
vnd also z wen fall zwayer Anlaytten/durch solh übergab/  
vnd veränderung eines vrbargüet oder anndern güetzhalben/  
in der Ersten Stift miteinander fürkömen/so soll hinsuran  
für solhen andern fal in der Ersten Stift nur halbe Anlaytt  
genomen werden.

Wo sich aber die Kinder oder Erben vor der Ersten Stift  
eines jnnhabers/dem sy ire tayl übergeben oder verthaussen/  
nit vergleychen/sonnder ainen von Jr aller wegen/auff das  
güet setzen/so soll es bey der Ersten Anlaytt allain beleyben/  
vnd alsdann ains aus jnen vnuerzigen der anndern/in das Vr-  
bar geschriben werden.

Vñ so sich dieselben Erben nachfolgend über kurz oder lang  
aines inhabers vergleychen/ oder sonnst durch todsall ver-  
käuff oder übergäb aines oder jr mer/ oder jr aller tail verän-  
dert werden. So sollen allain/ der oder die tayl/ damit sich al-  
so die veränderung begibt geanlayt werden Auch mit vmb mer  
oder höher/ dann souil sich aus der ersten ganzen Anlaitt auf  
ain tayl gebürt.

Es sollen auch all annder Grundherren dise mass gegen iren  
Urbarleuten Holden vñ Hindersässen also hälten. Doch wel-  
he Grundherren gegen iren Urbarleuten Holden vñ Hindersässen/  
der Anlaytten in zwysachem fall/ wie obsteet/ bishier  
nit in gebrauch gewesen sein/ sonnder allain ain Anlaytt von  
den Erben samentlich vnd dem besyzer dem sy jr gerechtigkeit  
ten verrer verkauffen vnd übergeben/ in der Ersten Stiftt ge-  
nomen haben/ dabey sol es hinsüran auch beleyben/ vnd die  
Vnnderthanen von neuem damit nit beschwärzt werden.

### Der Bröbst vnd ambtleüt traggellthalben.

Item für ain Traggellt sol hinsüran in vnnsern vnd vnsers  
Stiftts/ Brobsteyen/ vnd ämbtern/ nur vier kreützer gegeben  
werden. Es sollen auch solhe Traggellt/ nit nach der menig  
der Erben/ sonnder nach menig der fäll/ Auch so der Erben  
mer sein/ von jnen allen nur ain Traggellt gegeben werden.

### Urbar Einschreibgellt

Von dem Einschreiben vnnserer Urbarleüt/ in vnnser Urbar  
Haben vnnser Hofmayster/ Hofschreiber vnd annder vnnser  
Officier von alterheer/ für Jr gerechtigkeit/ ain Einschreib-  
gellt/ gehabt/ vñ bishier von den Urbarleuten genomen/ solh  
einschreibgellt. Dieweyl das kain neuerung ist/ soll bemelten  
vnnsern Officiern/ durch vnsere Urbarleüt hinsüran auch ge-  
geben werden. Doch allain nach menig der fäll vnd Anlaitten.  
Auch der güetter vnd gründt/ die jr vndterschidlich diest/ in  
den Urbarn haben/ vñ nit nach menig der Erben. Also/ wan-  
der Erben zu aym Urbargüet oder Gründt/ mer dann einer  
sein/ vnd ob gleych jr yeder in das Urbar geschriben wirdet.  
So sollen sy doch all miteinannder von aym fall aines güets  
oder anndern grundts/ der sein vnderschidlichen diest/ in dem

Urbar hat/ nur ain einschreibgellt geben. Das ist nemlich in  
vnnsern Brobsteyen im Zillertal vñ Virental/ Neün kreützer  
Vnd sonnst in allen anndern Brobsteyen vnd ämbtern/ Acht  
kreützer. Es soll auch von anndern Grundtherren/ die des ein-  
schreibgellts bey jren Urbarn bisheer auch in gebrauch gewes-  
sen sein/ die Ordnung/ wie obsteet/ gehallteu. Doch sol solh  
schreibgellt/ bey der Sūma/ wie der ain yeder in gebrauch ist/  
beleyben.

### Willengellt.

Des Willengellts halben soll es hinsüran also gehaltn werden  
Nemlich/ wen sich begibt/ daz ain Urbarsman/ oder ain annderer  
Hindersäss/ vns oder andern Grundherren zugehörig/  
zü zeiten vnuogtper kinder hinder sein verläft/ die dem güet mit  
vor sein mügen. Desgleichen/ wann einer mer güetter hat/  
vnd dieselben mit aygem Rügkhen selbst nit besyzen mag.  
Vnd deshalben solh güetter mit vnnserer Bröbst vnd Ambt-  
leüt oder annderer Grundherren bewilligung auff ain anzal  
jare/ ainem anndern bestandsweyse/ verlassen/ oder wo zü  
zeiten/ ain Urbarsman oder anderer hindersäss/ durch frank-  
hait/ Prunst/ Gewässer/ oder Schwur/ in armuet thompt/  
vnd seiner notturst nach ain Stuckh aus seinem Urbar oder  
annderm güet/ des Er mit dem wenigisten nachtayl emperen  
mag/ auf ain anzal jar/ vnd auf widerlösung/ versetzen wil  
vnd mües/ darinn doch vnnser Bröbst vnd Ambtleüt/ allzeit  
Jr güete erfahrung haben/ auch solh verlassung vnd verpfend-  
tung der güetter vnd gründt/ außerhalb oberzelter vrsachen  
vnd Lehaftt kains wegs gestatten sollen. So sollen vnnser  
Bröbst vnd Ambtleüt/ auch annder Grundherren/ so Sy  
in ain solhe verlassung vnd verpfendtung bewilligen/ von  
solhem jrem willen ungewöölich auf fünff jar/ auch für das  
Sigill vnd den brief/ so darüber aufgericht wirdet/ ain gul-  
din oder ain pfundt pfennig nemen/ vnd nit mer. Wären  
dann der jar weniger/ oder ain Urbargüet oder Gründt so  
schlecht/ vnd aines kain weert/ so sol der Urbarsman/ oder  
Hindersäss/ darinnen mit einer ringerung nach zymlichen din-  
gen bedacht werden.

## Sigelgellt vnd Schreibgellt von brieflichen vrkhünden

Nachdem in den Beschwärungen vnserer Vnderthanen auch  
fürkommen ist. Daz sy in aufrichtung der brieflichen vrkun-  
den/ auch mit überflüssigem Sygl vnd Schreibgellt/ in mani-  
gerlay wege/ bisheer beschwärzt worden seïn. Und aber/  
dieser Artikel/ ettwouil anhening hat/ derhalben die nottürfft  
eruordern wil/ mit zeytigerm Rate/ in aufrichtung der neuen  
Lanndsordnung/ verner gepürlisch mass vñnd ordnung darin-  
nen fürzunemen. Damit aber dannoch vnser Vnnderthanen  
mitler zeyt/ alls vil möglich ist/ vor vnpillicher beschwärzung  
verhüett werden. So haben wir vns mit den Stännenden  
vnserer Lanndschafft/ bis die new Lanndsordnung aufric-  
ht wirdet. Hyerinnen ainer solhen mass enntschlossen.

Nämlich/ daz vñser Vnnderthanen hinsuran die nachuol-  
gennenden brief/ außzurichten schuldig sein sollen. Alls/ vñs  
Kheuß/ Heyrat/ übetab/ verzicht/ schullden/ auch verwey-  
fung/ wechsl vñnd außträg. Aber sonnst aller aunderer brief-  
halben/ wo die nach gelegennheit der fäll vñnd sachen/ mit so  
gar nodt seïn/ soll es in vñserer Vnnderthanen willen steen/  
solh briefe außzurichten vnd zunemen.

Es soll auch für die brief/ so auf Pergamen geschubben wer-  
den/ Alls Nämlich/ vñs Kheuß/ Heyrat/ Übergab/ Ver-  
zicht/ vnd was sonnst für brief der nottürfft nach auf Perga-  
men geschubben werden miessen. Nämlich/ wo die Sach/  
darumben derselben brief ainer außgericht bis in fünffzigh  
guldin/ oder darüber trifft/ für das Sygill/ ain pfund pfen-  
ning. Und wo die haubtsach hinder fünffzigk guldin trifft/  
allß dann für das Sygill/ Sechs schilling pfennig/ vnd für  
das Schreibgellt/ fünffzehn kreuzer/ genomen werden.  
Und von ainem Papyren brief/ für das Sygill/ Vier schil-  
ling pfennig/ vñnd zu Schreibergellt/ Acht oder Zehn kreü-  
zer/ darnach der geschrifft vil sein mües. Wo dann zu  
zeyten ain Vnnderthan/ ain brief außzurichten begert/ vñs  
schlechte Sach/ Vnnder der Gerichts Obrigkeit oder des

Grundtherren Betschafft/ das sol ainem yeden stat thän/ vñ  
für das Betschafft bezalt werden/ Sechzigk pfennig. An  
welhen orten aber/ von alter vnd bisheer/ durch vnser Ambt-  
leüt oder annder Grundtherren/ für Sygill vñnd Schreyb-  
gellt/ von den brieflichen vrkhünden/ weniger dann/ wie ob-  
steet/ genomen worden ist/ dabey soll es hinsuran auch bley-  
ben/ vnd die Vnnderthanen mit khainer neuerung beschwärzt  
werden.

Item so ein Vnnderthan zu aym güet/ zwien oder mer Grun-  
therren hat/ vnd sich ain fall deshalb züetregt/ daz ain brief  
außgericht vnd besygelt werden. So soll solher briefe durch  
die Grundtherren miteinannder besygelt/ vnd jnen beden mit-  
einander/ nur ain Sygelgellt bezalt werden. Daon aym ye-  
den/ souil sich zu gleychem tayl/ auf den Zynß/ so Et auf dem  
güet oder grundt hat/ gepüret züsteen sol.

Item So ayn Hindersäss von vns oder anndern Grundt-  
herren/ zu aym güet ettlich annder gründt hat/ die vns oder  
aym anndern Grundtherren allain züeghörig/ auch die vnder  
schidlich verzinst/ So sollen vñser Brobst vnd Ambtlewt/  
auch die Grundtherren/ so sich ayn fall mit dem innhaber be-  
gibt/ solh güet vnd die ainletzigen gründt. Doch vñnderschid-  
lich mit jren nämen vnd dinsten/ in ain brief kömen lassen/ vñ  
der hindersäss nit schuldig sein/ vñs ain yedes stückh ain son-  
dern brief außzurichten/ vnd zunemen.

## Schmaltz vnd Käf dinst

Dieweyl wir vnd annder Grundtherren von den Stännenden  
vnserer Lanndschafft/ des Smalz vnd Käf dinst/ solanng  
in gebrauch seïn/ So kan darinnen kain veränderung besche-  
hen. Es wär dann/ daz ain Vnnderthan/ über das/ so die vr-  
bat schmaltz vñ käf Register vermügen/ durch vnser Brobst  
vñ ambtleüt/ oder durch annder gruntherren oder jr ambtleüt  
vñnd diener/ in einbringung solher schmaltz vñnd käfdienst/

mit vnbillicher neuering bisheer beschwârt worden wâr/  
oder noch beschwârt würde. Darinnen wöllen wir auff des  
beschwârten ersuechen vnd sein anzaygen/von wem vnd wie  
Er beschwârt wirdet/ernnstlich vnd gnedig einsehen haben.

## Trayd anschleg

Nachdem durch vnser Vnnderthanen vndertheinglich gepe-  
ten worden ist/jnen ab den Cässtern in vnnserm Lannde/den  
Getrayd zu Irer nottürfft in ainem zymlichen Anschlag/ain-  
lezig zugeben. Darauf haben wir vns mit den Stânneden  
vnnserer Landtschafft/bis auf vnnser verter wolgesfallen/  
gnediglich entschlossen/daz ab vnsern vnd anderer Grundt-  
herren Cässtern im Lannde/vnnsern vnd jren Vnnderthanen/  
zu Irer Haßnottürfft/der Trayd/ainlezig souer Sy den  
sonnst zu faylem kauff mit finden kunnen/in ainem zymlichen  
Anschlag gegeben werden soll.Wo auch wir zu zeyten/vnn-  
sern Ambtleütten/vnnsern Trayd miteinannder in anschlegen  
geben würden/So soll dannoch in solhen anschlegen vorbe-  
hallten vnd aufgedingt werden.Wo yemanns vnnseter vr-  
barleüt/aines Trayds zu haßnottürfft bedürffen würde.  
Daz alsdann die Ambtleüt/jnen solhen trayd.Nemblich/den  
schwären/ain Metzen/vmb ain kreutzer/vnd den ringen/ain  
Metzen/vmb zwey pfennig/vn̄ mit höher/über den anstag  
So ain Ambtman/zu yeder zeyt von vns haben wirdet/zu-  
geben/auch schuldig sein sollen.Doch sollen die Vnndertha-  
nen solhen Getrayd/allain zu haßs nottürfft branchen/vnd  
kain fürkauff damit treyben.

## Grundt Zynns

Item/So ain haß auf ain Grundt pawet wirdet/da vor  
kain haß gestandden ist.So soll der Zynns allain von dem  
grundt/vnd nit von dem haß geschriften vnd geben/auch so  
es zu fällen kompt/allain die grundtgült veranlaytt werden.  
So aber das haß des grundtheren aygen wirdet/so mag er  
damit hanndeln seines gevallens.

## Einfäng vnd Hofstett

Die Einfäng vnd Hofstett/sein bisheer auf der frey vñ ge-  
main durch vnser vnd vnnserer voruordern/güter gedechniß  
Hofmayster/von vnsern als Lannfürsten wegen/zu zeyten/  
aus manngel der Herbergen/sonnderlichen/an den otten/da  
Perckwerch sein/auf zufahē vergönnt worden/doch allweg  
mit vorwissen/vnd zu zeyten auch auf fürbethe der nachtpers-  
chafft derselben ortt. Das wöllen wir hinsiran auch thün/  
doch daneben bey vnsrem Hofmayster daran sein/daz solhes  
mit gnügsamer erkündigung vnnnd on sonndern nachtayl der  
nachtperschafft beschehe/vnnnd sonnderlich/daz der nachtpers-  
chafft an jrem pluemgesüech/des sich dieselben Sölheuer mit  
jrem viech/zu zeyten übermässiglich gebrauchen/verschonnt  
werde/darinn wir dann so wir ersuecht werden/allzeit gne-  
dig wenndung verschaffen wollen.Wo aber aymich Einfäng  
on vnser oder vnsers/vnd vnnserer voruordern Hofmaister  
Bewilligung/innerhalb zwainzigk jaren bescheiden wären/  
dieselben Einfäng vnd Sölheuer/wo vns die anzaigt wer-  
den wöllen wir vonstundan abschaffen.

## Das die Ambtleüt nit kauffman- schaft treyben noch sonnst die Vnnderthanen beschwären.

Nachdem auch in den Beswärungen vnsrer Vnnderthanen/  
fürkomeu ist/daz vnnser Pfleger/Brobst/Ambtleüt/Land-  
richter/vnd ic Verweser/mit dem fürkhauff der pfennwert/  
vnd in ander weg/vnnsern Vnnderthanen zu Beschwärung  
hanndtierung vnd Kauffmanschafft treyben. Darauf ist vnn-  
ser ernstliche maynung vnd wöllen/daz fürter kainer vnsrer  
Pfleger/Brobst/Ambtleüt/Richter vnd derselben verweser/  
sich kainerlay gewerb vnnnd Kauffmanschafft/in jren verwall-  
tungen mit gebrauchen/noch auch die Vnnderthanen dringen/  
die Hochzeyten vnd andere züsämengeng/bey jnen zthalten  
vnd zering zethün/Sonder allain jrn Ambts verwaltungen  
aufwartet.Wo sich aber einer oder mer des fürter nit massen  
sonnder über dise vnsrer ordnung/vngehorsam hallten/oder  
sonnst in ander weg/vnsrer Vnnderthanen vnpillicher wey-

se/beschwären würde. Darinn wollen wir als Herr vnd  
Landfürst so vns das anbracht wirdet/alzeit ernstlich ein  
sehen haben/vnd den beschwärten gnedige wenndung thün/  
Auch dieselben vnnser Pfleger/Brobst/Ambtleüt/Richter/  
vnd Jr Verweser/darumben nach vngnaden straffen.

### Jagen vnd Vischen

Dieweyl die Gejayd vnd Vischereyen/ain anhang vnnserer  
Landfürstlichen oberkait/vnd von alter/ye vnd allweg/  
über aller mennschen gedechtnuß/in dem pan gewesen/auch  
vns in dem jüngsten Herzog Ludwigs vō Bayrn ic. vertrag  
vorbehallten sein. So behalten wir als Herr vñ Landfürst  
vns die nochmals beuor/doch damit vnnser Vnderthanen/  
auch zum wenigsten von dem wildpret beschedigt werden/so  
lassen wir jnen züe. Daz ain yeder bey seinem ghet/ain hundt  
haltn/vñ damit das wildpret aus sein gründē schrecken müg  
Doch sollen dieselben hundt/zü der zeit/als das widtpret setzt  
geprügelt/auch zü winterzeiten so die schneegefell vor augen  
sein/allweg bey den heüsern/bey swärer straff angelegt wer-  
den. Aber die Pern/Wolff/vnd Lur/sollen in der gemain zü  
jagen vnd zü fahen frey sein. An welhen ortten auch bisheer  
die wasser oder päch zü vischen frey gewesen sein/dabey soll  
es hinsüran auch bleiben/vnd darinn kain neuerung gemacht  
werden.

### Reys Gejayd.

Die Reys Gejayd sollen durch vnsrer Pfleger/Brobst/Rich-  
ter/vnd Ambtlerot/die des in gebrauch sein/an den wälden/  
vnd forsten/jr yedes verwesung/daran sy die von altherer  
vmb beständt verlassen haben/hinsürā wie bisheer/verlassen  
werden. Doch sollen sy darinnen khain neuerung gebrauchen.  
Es sollen auch die Vorster/die also die Reys Gejaydrecht be-  
steen/das fliegend wildpret zü der zeit des prüets/so ain yed-  
lich phaltzt mit schiessen noch fahen/bei einer peen aines pfund  
pfennig so Er darüber mit aym solhen wildpret in der pruet  
zeit betreten wirdet.

Aber die klein vogl/ auch die taubē/ambeschl/droschl ic. sollen  
in der gemain mit dem leym/hürden/vñ pogen zufahñ erlaubt  
sein. Doch auch aines yedes jares erst nach verscheyning sant  
Johannis tag zü sunbenden/vnd vor nit/bey der straff/ains  
pfund pfennig.

### Daz Die Ledigen vnd Unangesessen nit Kauffmanschafft treyben.

Item Die Ledigen vnd Unangesessen leüt/ auch die Pawrn  
sün vñ Dienstpoten/sollen sich fürter kainer Kauffmanschafft  
vnd handtierung vndersteen/noch die haimlich oder offenlich  
treyben. Wo aber einer damit betreten wirdet/so sol er vmb  
die waer/damit Er solh Kauffmanschafft treybt/in vnnser  
Haubtmanschafft versallen sein/vnd darzüe nach vngnaden/  
gestrafft werden.

### Fayl Fleisch vnd Prot auf dem lannde.

Vnns ist auch in den Beswärungen vnnserer Vnnderthanen  
fürkomen. Daz die Metzger vñ Pecken auf dem land mit dem  
fayln fleisch/vnd prot/den gemainen Man vasss Beswären.  
Also/daz sy den Leuten jr gellt mit solhem fleisch vnd prot  
nach gelegenheit der keuß des viechs vnd getrayds mit verglei-  
chen. Demnach so schaffen wir mit Ewo/vnnsern Pflegern/  
Richtern/vnd Ambtleütten ernstlich vnd wollen/daz ain ye-  
der in dem Gericht/seiner verwesung/auf solh Metzger vnd  
Pecken/sein vleissig aufmercken hab/vnd daran sey/Daz sy  
mit dem fleisch vnd prot/zü yeder zeyt den gemain kauff des  
viechs vnd getrayds gemäss/vnsern Vnnderthanen jrnpfen-  
ning vergellten/vnd khain vnpilliche schatzung darinn gebrau-  
chen. Deshalbem jr dam durch Ewo/oder euer nachgesetzt  
Ambtleüt/derselben fleischacker vnd peckenpenck vnd läden  
offt besehen/vnd hierinnen gute erfahrung haben lassen sollt.

### Daz Die Oberkait ain fräuel oder handl straffen müg on ain anklager.

Item/ Ain Pfleger oder Richter mag ain fräuel oder handl/  
on ain Ankhager wolstraffen/wo sich gleych die tayl selbst  
gütlich miteinander vertrage. So gibt auch der alt Herzog  
Ludwigs Spruchbrief/züe. Wo sich ain hanndl vmb erbar  
sachen zwischen den Vnnderthanen züetregt/vnd dem Geri-  
cht nit klagt/sonnder durch die Nachpern vertragen vnd hin-  
gelegt wirdet. Daz dannoch die parthey/die durch der Nach-  
pern richtung vtrecht gefunden/dem Richter angesagt wer-  
den vnd abtrag/schuldig sein sol.

## Vänncknus in Burgerlichen sachen

Item Wo ain angessener vmb Burgerlich Erber sachen an gesprochen/vnd für die Oberkeit gewenndt wirdet von dem selben/so es not thuet/soll zymlich Burgschaft vnd glübd angenomen werden.Es wär dann/daz einer sich gegen dem Gericht ungehorsam gehallten/oder sonst vmb ain verhandlung mit vänncknus pillich gestrafft würde.

Es sol auch kain Pfleger noch Richter kainen mit vängknus zu einer tädig aines übermässigen wanndels/wider die Ehehaft vnd den gemain Lanndbrauch dringen. So auch ain armer Man sich in aym wanndl beschwärkt bedunckht/so sol jme der züeganng zu vnns oder vnnsern Statthaltern vnd Räten allzeyt beuor steen/vnd jme der durch khainen Pfleger oder Richter/nit gesperit werden/bis wir mit mererm rate/in der neuen landsordnung weyter gepürlich mas der wändl halben fürnemen.

## Von verlust vnd fürfang wegen

Item. So einer seinem güet/das jme gestolen vñ enpfrembdt wirdet/selbst nachkompt vnd das ergreyfft. Der sol des fürfangs frey sein.Wo aber solh verloren güet/durch das Gericht/oder annder verkundtschafft wirdet/so sol Er dem Gericht derselben ort/do das betrette wirdet/zu fürfang geben zweinundsbyentzig pfennig/vnd alsdann mit desselben Gerichts bewilligung/solhem seinem güet verrer nachkömen/vñ das zu sein hannden bringen.

## Gerichts Fuetzung.

Die Gerichts Fuetzung in den Gerichten soll hinsuran wie von allterhere gegeben werden. Wo aber darinn durch einen Pfleger/Richter/oder annder Ambtleüt/ain Neuerung gebraucht/vnd vnns die anbiacht wirdet/so wollen wir die gnedigklich abschaffen/vnd vnnser Vnnderthan damit zübeschwaren/nit gestatten.

## Den Überflusß in den klaidern abzethuen.

Nachdem der überflusß der klaydung vndter dem gemainen Pawismann vnd ledigen knechten vnd diernnen auf dem Lannde bis her in khurter zeit vasst eingerissen/dardurch auch der gemain Man vasst erarmbt/vnd durch die Lanndfaren den Schotten vnd Soffoyer an dem gellt ersaygert würde. Deshalb vns gemaynklich die Gericht vmb gnedige einsehung/vndterhenigklich gebeten haben. Demnach so haben wir vns mit den Ständen vnnserer Lanndtschafft/vnnsern Lannd vnd Leuten/zu aufnehmen/diser mass entschlossen Ordnen auch vnd wollen/daz nw fürohin auf dem Lannde vnnser Stifts/durch den gemainn Pawismann/auch sein weyb/kinnder vnd Ehallten khain Samat auf den rockhen. Auch khain goldt in den krägen vnd in den schlayr leysten/noch auch die Seydein wammas/Pyret/getaylt oder zerschnitten hosen vnd wammas/nit getragen werden sollen

Es sol auch khain Pawisman fürbas/jme seym weyb vnd hindern tewrer tuech kaussen/dann vngewörlich/die gemain Losrer sein.

Doch was einer vor disem fürnemen kaufft/vñ in sein gwalt bracht herte/dz sol jme zymlich zütragen erlaubt sein/bis solh wadt zerrissen würde.

Es soll auch den knappen in den Perckwerchen hinsuran die Pyredt vnd getaylten Klayder zütragen erlaubt sein.

## Hochzeysten vnd gemain Tantz.

Nachdem in den Hochzeysten ain zeythere auch ain grosser costen vnd überflusß gebraucht/vnd der gemain Man an seinem vermügen dardurch auch vasst ersaygert worden ist. So geben wir der Hochzeystenhalben fürbas dise ordnung vnd wöllen. Daz hinsuran ain Pawisman auf dem Lannde/nit mer dann drey Tisch zu Hochzeyst haben. Auch nit mer dann ain mal/vñ über fünff oder sechs richt mit geben sol. Es sol auch ain Khanfolck nit über fünfzehn kreutzer/vnd ain ledige person nit über zehn kreutzer zu weysat schencken.

Es sollen auch außerhalb der Hochzeiten all gemein Täntz  
bey den Tasernen/ vnd anndern dritten/ in Stetten/ Märkten  
vnd auf dem Lande/ verpoten/ vnd durch vnnser Pfleger/  
Richter/ vnd Ambtleut mit gestatt werden/ bey vermeydung  
vnnserer straff.

## Die Sünden vnd Laster zu vermeyden

Vnd dieweyl ain zeyther die Sünden vnd Laster/ layder al-  
lenthalben vass eingerisen/ derhalben der Allmächtig Got er-  
zyrnet/ vnd etwouil straffen/ alls mit kriegen/ sterben vnd  
verderben. Auch yetz durch den grausamen Wüetrich den  
Türckhen über vil Land vnd leüt/ in kürzer zeyt hat geen las-  
sen. Das dan pillich ain yedes Cristen mensch behertzigen/ vnd  
sich von solhen sünden vnd lastern abwennden vnd zu Got  
keren sol. Demnach so wollen wir auch aus schuldiger pflicht  
hyemit all vnd yede vnnser Vnnderthanen/ geistlich vnd welt-  
lich mit allem ernnst vnd vleyß ermant haben. Daz ain yeder  
solhes getrewlich vñ mitleydenlich behertzigen vnd bedencken/  
vnd fürbas die sünden vnd laster vermeyden/ vnd Got den  
Allmächtigen zügefallen/ Eeren vnd lob leben wölle. Wir ge-  
pieten auch hyemit allen vnd yeden/ vnsern nachgesetzten ober-  
keiten/ Geystlichen vnd weltlichen/ in Stetten/ Märkten/  
vnd Gerichten/ ernnstlich vnd wollen. Daz Sy in jren ver-  
wallungen vnd Gerichtszwängen auf die offennwaren sün-  
den vnd laster mit allem ernnst sehen/ vnd die ihenen die sich  
derselben nit massen wollen/ an leyb vñ güt darumben swär-  
lich straffen/ vnd darinnen nyemands verschonen.

Dise obgemelten Artikel all vnd yed/ sollen also bis zu auff-  
richtung der neuen Lanndsordnung/ in vnnserm Stift vnd  
Lande/ vespstiglich gehalten werden. In welher Landsord-  
nung dann sonderlich von aym güten ordennlichen Lannds  
Rechten vnd Gerichts Process/ auch des fürkauffs vnd ann-  
derer güter Pollicey halben/ die zu aufnemfüg gemaines lands  
diennstlich sein werden/ verrer nottürftige fürsehung besche-  
hen sol. Doch so behalten wir vnis hyerinnen beuor/ die ob-  
gemelten fürnemen vnd Artikel/ mit vorwissen vnd Rate/  
der Stännde vnnserer Lanndtschafft/ allzeit zu myndern/  
zu meren/ vnd zu mässigen/ wie dann das vnsrer vnd vnsers  
Stifts nottürft vnd gelegenheit zu yeder zeyt sein wirdet/  
on geürde.

Vnd gepieten darauf euch/ allen vnd yeden vnnsern Ambtleu-  
ten/ Virzhümber/ Pflegern/ Bröbsten/ Ambteuten/ vnd jren  
Verwesern/ Land vnd Perchtichern/ Statrichtern/ Bur-  
germaystern/ Räten/ Gemainden/ vnd sonst allen anndern  
vnnsern Vnnderthanen vnd getrewen/ ernnstlich vnd wollen  
Daz jr solhen Artikeln vnd fürnemen/ wie obsteet/ in allen vñ  
yedlichen jrn jnnhaltungen nw fürohin gehorsamlich gelebet  
vnd nachkommet/ die auch allenthalben in Euren Gerichten  
vnd verwallungen/ vespstiglich hältet vnd handhabet Ere-  
quiert vnd volziehet/ vnd darider nit thuet/ noch das ye-  
mannnts annderm zethün gestattet in khain weyse/ bey ver-  
meydung vnnserer swären vngnad vnd straff. Darnach wisse  
sich euer yeder zürichten/ jr thuet auch daran vnsrer ernnstliche  
maynung. Datum in vnnserer Statt Salzburg/ vnder  
vnnserm hye fürgedruckten Secreta/ Am Zwaintzigisten tag  
Novembri. Anno dñi cc. jñ Sechfundzwanzigisten.